



Terenga 2: Hōtaka 07 – kia

Tēnā anō koutou katoa kua tau mai ki te tatau o te whare o AKO. Tomo mai, hou mai, tapoko mai. Mehemea he painga o roto nei e ora ai tō ngākau, e iri mārō ai tō manawa, kapohia.

Hei Mahi Whakarongo

Nō tātou te māringanui i ngā pāhotanga pēnei i 'Te Pātaka Kōrero' e mau nei i ngā kōrero a kui mā, a koro mā mō ngā kaupapa huhua. I te rangi nei ka whakarongo tātou ki te reo o te tohunga whakairo o Ngāti Porou, o Pine Taiapa. I whānau mai ia i te tīmatanga o tērā rautau. Atu i ngā mahi ahuhenua me ngā mahi whakairo, he tuhi pukapuka tētehi o āna mahi. He tangata whakapapa anō hoki a Pine Taiapa.

Anei ngā pātai hei whakautu mā koutou.

1. He aha te kaupapa o ana kōrero?
2. Ko wai tō Tūwhakairiora tuahine?
3. He aha ngā tauira e rua o te haere tōmua a te wahine?

Whakatauritehia ō whakautu ki ērā o ngā ākongā o AKO.

He Whakamārama

E rima ngā whakamahinga rerekē o te kupu 'kia' hei wānanga mā tātou i te rā nei. Tirohia ngā tauira kei raro iho nei kia kitea ai e koe ngā whakatakatoranga mō ia whakamahinga rerekē.

- | | |
|-----------------------------|---|
| 1. Kia + tūāhua | <u>Kia</u> ora. |
| Kia + tūmahī wheako | <u>Kia</u> mōhio koe, he whanaunga tāua. |
| 2. Kia = <i>until, when</i> | <u>Kia</u> tae mai koe ka maranga au.
Me tatari kia karangahia tātou. |
| 3. kia...ai | Whakatata mai <u>kia</u> kite ai koe i te papa tuhituhi. |
| 4. kia / ki te | E pīrangi ana au <u>kia</u> mutu tō kaipāipa.
E whakaaetia ana <u>kia</u> haere koe. |
| 5. Kia + tau | <u>Kia</u> rua ngā huka. |

Hei Manatu

Hei whakamaumahara i a tātou, anei ngā kupu hāpai mō muri i ngā kupu 'Kāore anō' me 'Kātahi anō'.

Kāore anō...**kia** (Kāore anō...kua x)

Kātahi anō...**ka** (Kātahi anō...kia/kua x)

Hei Mahi

Whakamāorihia ēnei rerenga:

1. When the meeting finishes we'll have something to eat.
2. My boss has agreed that I should go to France.
3. I'd like five tickets please.
4. I haven't seen that movie yet.

Whakautu:

1. Kia mutu te hui ka kai tātou.
2. Kua whakaaetia e taku rangatira kia haere au ki Wīwī.
3. Kia rima ngā tīkiti māku.
4. Kāore anō au kia kite i tērā kiriata.